

ALAHADY FAHA-2 MANDAVANTAONA D



« Naneho ny voninahiny Izy ka nino Azy ny mpianany » (Jo. 2: 11)

Ry Kristianina havana, nifaranantsika tamin'ny Alahady lasa teo tamin'ny fankalazana ny batemin'ny Tompo ny vanimpotoanan'ny noely. Batemin'i Jesoa izay manambara ihany koa fa ny batemintsika tsy batemy fibebahana fotsiny fa batemy mampiditra antsika ho zanak'Andriamanitra. Rehefa zanany isika dia mivelona araka ny maha zanak'Andriamanitra izany sy mandray an-tànana ka mankalaza ny voninahitr'Andriamanitra amin'ny maha zanany antsika sy mizara ilay famonjena nomeny antsika amin'ireo manodidina antsika ka mampiditra antsika amin'ny fiainana

andavanandro. Izany no banjinintsika amin'izao Alahady faharoa mandavantaona izao, mampiditra antsika amin'ny fiainana andavanandro ary ny fiainan'i Jesoa no zary fiainantsika amin'ny andavanandro. Androany ny lohahevitra "Ny hahasambatra antsika no sitrak'Andriamanitra" dia manasa antsika hiaina izany rehetra izany miaraka amin'Andriamanitra satria eo

Vakiteny I : Iz. 62, 1-5
Tononkira : Salamo 95
Vakiteny II : 1 Kôr. 12, 4-11
Evanjely : Jo. 2, 1-12

anivontsika I Jesoa. Miara-dàlana amintsika izy ka fantany ireo hetahetam-pontsika. Ho tanteraka izany raha miombona aminy isika izay no mahatonga antsika matetika milaza fa raha manao ny asan'Andriamanitra isika dia Andriamanitra hanao ny asantsika ary ho lavorary kokoa satria lavorary izy.

Ny mahadiso antsika matetika dia mieritreritra mahavita tena samirery, mieritreritra fa lavitra Andriamanitra ka mikofokofoka irery, farany efa tsy mahita hevitra dia mitady Andriamanin-kafa isika ka lavo amin'ny zavatra tsy mety ka vao mainka mikorontana ny fiainantsika.

Ry Kristianina Havana, raha tiantsika ho génération mpanorina tokoa isika, hanarina ireo tontolo maro samihafa potika dia ny tontolo iainantsika, ny tontolom-piainantsika, ny tontolon'ny finoana izay potika daholo dia tsarovy fa amin'ny fanatanterahana ny sitrak'Andriamanitra ihany no hahavonjy antsika.

Miditra amin'ny fiainana andavanandro tokoa I Jesoa, hitantsika izany amin'ny Evanjely androany tamin'ny fampakarambady tany Kana, tany Galilea. Nanatrika izany fampakarambady izany i Jesoa sy ireo mpianany, sahirana ireo mpampakatra tamin'izany satria lany izay rehetra nomanina tamin'ny fikarakarana, lany ny divay.

Mitovy amin'izany koa maro ny zavatra tsy feno sy zavatra lany eo amin'ny fiainantsika ka sahirana isika. Maro ny zavatra mifamahofaho eo amin'ny fiainantsika nefa tsarovy fa eo anivontsika I Jesoa ary eo anivontsika koa i Maria ilay Reny mikarakara sy mikolokolo dia mahita sy mahalala izay manjo antsika. Manatona an'i Masina Maria isika fa izy afaka hampita amin'I Jesoa zanany ny hetahetam-pontsika isika te hahazo famonjena avy aminy.

Nilaza I Masina Maria fa tsy manan-divay intsony izy ireo ka novalian'i Jesoa hoe *“Izaho sy ianao moa no ahoana amin'izany, ravehivavy? Tsy mbola tonga ny fotoako”*. Efa eo anivontsika I Jesoa, efa nandresy ny fahafatesana izy, aza misalasala mandray ny sakramentan'ny fampihavanana, sakramentan'ny eokaristia *“Ataovy izao ho fahatsiarovana ahy”*. Nilaza izany tokoa I Maria tamin'ireo mpianatra *“Ataovy izay rehetra holazany aminareo”*.

Ny fanantanterahantsika ny sitrak'Andriamanitra no hanova ny fiainantsika ho tsara.

Ilay divay voalaza fa tsara ao amin'ny Evanjely dia tandindon'ny fiainantsika ho tsara raha miova ka miaraka amin'Andriamanitra ny fiainantsika, raha manao ny asan'Andriamanitra isika.

Matetika isika tsy manao ny asan'Andriamanitra fa an'izao tontolo izao ka mikoroso fahana ny fiainantsika.

Inona ny nataon'ireo mpianatra? Nameno ny siny enina izy ireo, tandindon'ny fiainantsika ny famenoana ny siny. *“Ary nisy siny vato enina teo, fidiovana araka ny fanaon'ny Jody, nahalany rano indroa na intelon'ny famarana avy, ka hoy i Jesoa tamin'izy ireo: “Fenoy rano ireo siny ireo”* Izany hoe ny hakamoana hovan'i Jesoa fahazotoana raha miaraka amin'I Jesoa isika.

“Ialao ny hakamoana fa fenoy ny fahazotoana”.

“Ialao ny fitiavan-tena ka fenoy fahafoizana”,

“Ialao ny lainga ka fenoy fahamarinana”,

“Iialao ny tsy fitiavam-bavaka ka fenoy fitiavam-bavaka”,

“Ialao ireny maikamaika ireny fa fenoy faharetana”,

“Ialao ny fahatahorana fa soloy fahasahiana”.

Izany no hampiova ny fiainantsika, fenoy fahazotoana, faharetana, fahasahiana, fitiavam-bavaka, fahamarinana, fenoy ireny toe-panahy tsara ny fiainantsika dia miova ny fiainantsika.

Izany no mahatonga ny Eglizy amin'izao fanombohana ny vanimpotoana mandavantaona izao taorian'ny fankalazana ny fotoan'ny noely mametraka an'io evanjely io. Tsarovy fa ny famantarana voalohany tany Kanà no nanehoan'I Jesoa ny voninahiny ary nino ny mpianatra.

Ny finoana izay alalinintsika no dikany siny enina io. Katolika aho ka alaliniko izay inoako.

Fenoiko siny enina izany finoako izany fa tsy mipetrapetraka fotsiny: raisiko an-tànana izay inoako sy iainako. Ankalazaiko izay inoako, tsy vitany mandalina fotsiny aho fa mankalaza ny litorjia ary zaraiko izany finoako izany ary hânana ny faharetana amin'izany finoako izany satria io no hitondra ahy

amin'ny famonjena. Tsy hoe hireharehana izany fa atao amim-panentrentena, izany indrindra no ampianarin'I Md Paoly ao amin'ny vakiteny faharoa *"Samy omena ny fanomezana maneho ny Fanahy izy tsirairay avy, mba hahasoa ny be sy ny maro. Fa ny anankiray omen'ny Fanahy teny fahendrena, ny anankiray teny fahalalana, araka io Fanahy io ihany; ny anankiray finoana, araka io Fanahy io ihany; ny anankiray fahazoa-manasitrana, mbola avy amin'io Fanahy io ihany koa; ny anankiray, ny manao fahagagana; ny anankiray, ny maminany; ny anankiray, ny mahafantatra ny fanahy samihafa; ny anankiray, ny miteny fiteny samihafa, ary ny anankiray, ny mandika teny. Fanahy iray ihany anefa no manao izany rehetra izany, sy mizarazara azy amin'ny isan'olona, araka ny sitra-pony"*. Samy nomena fahasoavana maneho ny Fanahy ny tsirairay avy ka amin'izay afaka mifameno sy mifanasoa hanasoavana ny be sy ny maro. Ireny fanomezan'ny Fanahy masina ireny, ireo talenta ao amintsika ireny. Izany no ampianarin'I Jesoa ao amin'ny Evanjely, fenoy ny siny ary zarao " fenoy ny talenta nomen'Andriamanitra antsika ka zaraintsika amin'ny mpiara-belona. Rehefa mifampizara isika, raha mifanasoa isika araka ny voalazan'Izaia mpaminany *" satria tokana ny tadiavin'Andriamanitra dia ny hahasambatra antsika"*, ny lahatr'Andriamanitra dia ny fiadanana sy hahasoa antsika ka aoka ary isika hiombona aminy tokoa indrindra hanatanteraka ny sitrak'Andriamanitra araky ny voalazan'I Masina Maria amin'ireo mpianatra *"Aoka isika hanao izay lazain'ny Tompo amintsika"* izany hoe manao ny asan'Andriamanitra isika dia hiova tanteraka ny fiainantsika.

Ry Jesoa Kristy ô, amin'izao fahatsiarovana ny famantarana lehibe voalohany nataonao tao Kanà izao sy ny fangatahan'ilay reninao sady reninay be fitiavana izay tsy mitsahatra mikolokolo sy mahasoa anay, ampio izahay hahay hanatanteraka izay voalazanao aminay tahaka an'i Masina Maria reninao,

Ampio izahay mba hahay hitsimbina ireo manodidina anay, hahay hameno ny sinim-piainanay, ny sinin'ny faharetana, fahazotoana, fahamarinana, fandraisana an-tànana, ny fizarana ny finona, ny fitiavam-bavaka ka amin'izay dia ho sambatra tokoa izahay ao aminao ary dia ho tanteraka tokoa ny maha génération mpanorina anay ka ho Eglizy Olona Velona eo anivon'ny mpiara-belona izahay, noho izahay EOY dia ho vonona mandrakariva hizara ny vaovao mahafaly amin'ny mpiara-belona aminay ka hanorina ny Eglizy Tranon'Andriamanitra eo amin'ny fiainanay. Tahio ny fianakavianay mba ho fianakaviana misy anao ka ho Eglizy tokoa ny fianakavianay. Amen

Mompera Arsevka Benjamin Ramaroson